

SHWBIZ KLIP

BON DIA



Mardigras Street Party ta awe

Cu Academy Brass "The Reunion 2009", dos escenario y 8 banda

E dia a yega pa cual ta reina un entuismo enorme pa por mira "Academy Brass" bek den accion manera cu nan tabata 15 aña pasa. E reunion pa bolbe tuma nan instrumento y prepara nan exitoso repertorio cu nan a bira asina popular pe dje.

Tur esaki ta awe diabierna hunto cu diferente banda invita cu dos diferente escenario plus atraccíonnan musical den e night clubnan mes. Ya for di basta dia caba Academy Brass ta ensayando na CB Dakota p'asina pasa riba na repertorio cu porcierto diabierna ultimo nan a keda cla cune y for di awe e ensayonan ta inicia intensivamente p'asina caba di 'bland' henter e show cu lo tin cosnan cu nunca bo a mira y sinti.

E anochi aki lo ta un recuerdo, un anochi pa immortalisa di con nan a wordo yama "The King of Kings" combina cu ritmo, alegria, animacion y coreografia pa loke semper e brass band a wordo reconocí riba caya y den nan presentacion....

Pa cada un di e casi 40 integrantenan aki di Academy Brass, esaki ta un reto personal pa acepta esaki. Un brassband, e ritmo di asambeho di e forma cu semper nan a wordo reconocí p'e...

Un solo presentacion, riba un solo anochi despues di mas di 15 aña, hopi di e integrantenan a bay coba den nan baul di recuerdo p'asina tece esaki den un dimension diferente pa diabierna awo: Academy Brass...The Reunion muestra cu añanan por a pasa, pero nan lo keda pa semper e rey

di reynan....Kico lo pasa despues di e reunion aki, ningun di nan no sa y no por bisa nada ainda, aunke ta wordo specula cu nan lo sigui, pero no tin confirmacion mes di esaki ya cu e set di drumnan no ta di nan y ta danki na diferente instancia y persona nan a logra sera e drumnan pa nan por ensaya y presenta diabierna awo.

Pa diabierna'nochi tur cos ta muestra cu tur expectativa lo wordo surpasa y cu lo tin un aglomeracion di hende hopi grandi den e 'hot zone' di waf....

Pa bolbe riba Academy Brass nos a compronde for di esnan cu ta dirigi e brassband, e seccion di brass ta den man di e legendario John Hessen cu no ta un figura desconoci den e mundo di Asambeho y e parti ritmico Didi Dirksz tin e timon fuerte wanta p'asina e palabra perfeccion keda prevalece.

Despues di e "training/ensayo" na 5 ocasion caba por bisa cu Academy a cuminsa haya forma y mucho mas fuerte cu 15 aña pasa.

Manera a wordo anuncia y señala, e evento Mardigras Street Party ta diabierna 30 Januari, fecha programa p'e presentacion di Academy Brass "The Reunion 2009" cu despues di mas di 15 aña ta bolbe topa otro pa un solo y unico presentacion.

Un anochi masha special pa wak, presencia y sinti Academy Brass "The King of Kings", un biaha mas den accion como e atraccion principal di e



anochi di Mardigras Street Party cu lo conta cu Robert J'dor y su Solo Banda plus e Reina di Tumba, Dushi Band cu su Soca Trance lo habri e anochi, Impak, NBO, Youth Xtreme lo ta den Tequila, BMW Plus ta den Bahia,

Tsunami ta sera riba e North stage, "2" Sweet lo tey su Easy "B" y Buddy y asina nos por sigui menciona, dos escenario y e acceso pa drenta Bahia, Sr. Frog's y Tequila cu un solo banchi.

E banchinan di entrada ya caba

ta obtenibel na CD & More na Cumana, Underground Cycles riba boulevard, Ticket Plus na Playa, Bee Wear na Paradera y Gallo Rojo na San Nicolaas pa unicamente 20 Florin y cumprando esaki ya caba bo ta contribuyendo n'e tres Fundacionnan / instancianan cu ta Arusurf, Fundacion Autismo y Insight Aruba Seminars Foundation. Mester señala si cu na porta esaki ta 25 Florin.

For di aña pasa cu a aserca e fundacion / instancianan aki nan a haya e idea sumamente fabuloso ya cu nan ta semper dispuesto pa haci algo na bienestar di nos comunidad.

Awe diabierna tur cos ta inicia pa 8"or di anochi den Weststraat dilanti di tur e night clubnan. Dushi Band lo ta e prome banda riba escenario esta pa (10"or n'e "North Stage".

